



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Distritu Baucau
7 Jullu 2014

Suku Fatulia ezije Parlamentu Nasionál Ignora Interese Privadu no Altera Lei Pensaun Vitalisia

Partisipantes ba treinamentu kona-ba demokrásia, prosesu halo lei no kna'ar orgaun soberanu sira nian iha Suku Fatulia, Sub-Distritu Venilale, Distritu Baucau, Iha 4 Jullu 2014, ezije ba membru deputadu sira ne'ebé hetan asentu iha Parlamentu Nasionál atu ignora sira nia interese privadu no halo alterasaun ba Lei Pensaun Vitalisia.

Ezijensia ne'e hatoo tanba partisipante sira konsidera katak lei ne'e favorese deit ba estrutura eis titulares orgaun soberanu sira no ignora interese komum no realidade sosial povu nian.

Treinamentu ho durasaun loron ida ne'e partisipa hosi ema hamutuk nain 30, ne'ebé kompostu husi feto ema nain 13 no mane ema nain 17. Partisipantes sira mai hosi estrutura suku, representante grupu feto, estudante, joventude feto no mane inklui membru comunidade sira.

“Atividade treinamentu ne'e hanesan ativadade kontinuasaun hosi JSMP, liu-liu atu hasa'e koñesimentu comunidade nian kona-ba demokrásia, prosesu halo lei inklui fo informasaun jerál kona-ba kna'ar prinsipal sira hosi órgaun soberanu Estadu Timor-Leste nian inklui lei sira ne'ebé parlamentu sira produs,” dehan Diretór Ezekutivu JSMP, Luis de Oliveira Sampaio.

Sr. Manuel Lopes Pereira, nu'udar Lia Nain no partisipantes ba treinamentu ne'e, husu ba meja Parlamentu Nasionál atu halo alterasaun ba Lei Pensaun Vitalisia, tanba lei ne'e fó benefisiu deit ba eis titulares sira. Ezijensia hanesan mós hato'o hosi Xefe Suku Fatulia **Sr. Constancio Jose do Rego** ne'ebé relembra hikas fali ba iha kampaña politika lideransa partidu sira ne'ebé promete atu halo alterasaun ba lei refere inklui Prezidente da República. Mesmu nune'e, depois manan tiha elisaun no kaer ukun sira ignora tiha sira nia promesa tanba ne'e nia ezije ba estadu liu-liu ba Paralementu Nasionál atu bele halo alterasaun ba lei refere, inklui husu ba Prezidente da República atu uza nia kna'ar hodi halo referendum ba lei ne'e tuir artigu 66 konstituisaun RDTL.

Alende ne'e, iha tempu hanesan, Xefe Suku Fatulia, lori comunidade sira nia naran agredese ba JSMP tanba bele fahe informasaun importante sira ne'e iha sira nia suku, nune'e bele aumenta tan koñesimentu comunidade nian kona-ba servisu órgaun soberanu estadu nian iha Timor Leste.

Treinamentu ne'e, hetan antusiasmu husi partisipante sira no rekomenda ba JSMP atu bele hato'o sira nia ejizensia ba Parlamentu Nasionál (PN). Sira husu ba PN atu halo lei presiza halo konsultasaun to'o baze iha sira nia aldeia no suku, sub-distritu no distritu sira, inklui ejize ba sociedade sivíl atu observa servisu Parlamentu Nasionál nian.

Treinamentu ne'e remata ho fahe manual treinamentu ba partisipante sira hodi distribui tutan ba comunidade sira seluk ne'ebé la partisipa. JSMP mós informa ba partisipante sira katak, iha tinan ne'e JSMP sei realiza Semináriu Nasionál iha Dili hodi konvida fila fali representantes suku atu hasoru malu ho deputadu sira.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp